

Hues a condena homber cu a abusa di dos mucha famia di dje na 1 año y 8 luna di prison

By **Redaccion34** - April 22, 2020



- Advertisement -

Mientras cu Fiscal a exige 2 año y 6 luna di prison

ORANJESTAD (AAN): Diaranson mainta Hues di Corte den Promer Instancia a dicta sentencia den e caso penal cu Ministerio Publico a cuminsa contra e homber C. Tratamento di e caso aki a sosode na comienso di luna y ayera tabata e dia di sentencia. Den combersacion cu abogado mr. Mohamed el a duna di conoce cu e sentencia ta 30 luna di prison di cual 10 luna ta condicional. Na comienso di April 2020, Fiscal a acusa e homber C. di a abusa di dos mucha muher menor di edad entre Maart y Mei 2019. Ta asina cu e muchanan ta famia di C. Fiscal a conclui cu C. ta culpable y a exige 2 año y 6 luna di prison.

ABOGADO NO TA HAYA CU TIN PRUEBA

Abogado mr. Mohamed na su turno a bisa Hues cu su cliente, e sospechoso C., ta wordo acusa di a abusa di dos mucha muher menor di edad. E abogado ta haya cu no tin

suficiente prueba di sosten. El a bisa cu su cliente, C., ta para riba cu e no a haci nada. E abogado ta haya cu Fiscal ta uza como prueba e declaracion di e dos victimanan siendo na opinion di e abogado, e dos victimanan ta contradeci otro. Un di e muchanan ta bisa cu C. no a mishi cun'e. Na e cas tabata presente otro famianan kendenan no a mira nada. E abogado ta haya straño cu ningun miembro di famia lo a mira algo mientras cu un di e muchanan ta bisa cu el a core sali for di e camber. E abogado a lesa declaracion di un di e victimanan na Hues Comisario caminda e ta muestra cu no tin claridad. E ta haya cu mester declara C. liber.

DISCUSION ENTRE FISCAL Y ABOGADO

Fiscal a reacciona cu aki ta declaracion di dos mucha menor di edad contra un familiar di nan cu lo a abusa di nan. Na opinion di Fiscal, ta imposibel cu e muchanan ta declara mesun cos. Ta durante un periodo largo esaki a sosode y na diferente momento. Por bien ta cu nan no ta corda exactamente kico a sosode. Fiscal ta haya cu e dos muchanan muher na diferente momento a declara mesun cos y duna detayenan tocante e abuso. E mayornan di e muchanan a declara mesun cos. Fiscal ta haya e declaracionnan aki confiabel. Segun Fiscal, e no ta kere cu e muchanan aki lo a bay inventa e declaracionnan contra C.

Abogado mr. Mohamed a reacciona cu ta acusa C. cu a haci abuso durante periodo largo. Fiscal mes ta bisa cu e declaracionnan no mester ta exacto. Pero abogado ta haya cu riba puntonan cardinal, e declaracionnan mester ta cuadra cu otro pero esey no ta asina. E abogado ta haya cu e muchanan ta contradeci otro. Pa loke ta e testigo, e abogado ta haya cu por usa e declaracion di testigo como prueba di sosten. Ta berdad cu e testigo tabata mira C. ta bay cerca e muchanan pero esey tabata pa cuminda e muchanan y nada otro.

E sospechoso C. den un forma emociona a bisa Hues cu esun cu a abusa di e muchanan mes ta ey fo y e cu ta inocente ta sera den KIA.

SENTENCIA

Hues ta haya legalmente proba cu C. a mishi cu e dos muchanan y a penetra un di e muchanan cu su dedenan. Hues a tuma C. na malo pasobra el a haci e delitonan serio aki pa satisface su mes. Hues a muestra cu ta conoci cu muchanan victima di abuso por keda afecta pa resto di nan bida. Pa cu e castigo, Hues a bisa cu e ta tene cuenta cu ta promer biaha cu C. a cay den man di husticia. Hues no a sigui e exigencia di Fiscal sino a baha esaki. Hues a condena C. na 30 luna di prison di cual 10 luna ta condicional. Esey ta nifica cu C. lo mester sinta 1 año y 8 luna di prison y e 10 luna condicional ta pa un

periodo di 2 año. Manera ta conoci, Fiscal por apela e sentencia. Tempo lo muestra si e caso aki lo bay Corte Superior of no.

- Advertisement -

Redaccion34
